

Hujan di Pahang, Johor berkurangan

KUALA LUMPUR 28 Jan. - Jabatan Meteorologi meramalkan keadaan hujan di Johor dan Pahang yang dilanda banjir teruk baru-baru ini mula berkurangan.

Bagaimanapun menurut jabatan itu, hujan sederhana lebat diramalkan berlaku di kebanyakan bahagian di Sarawak terutama di Kuching, Sri Aman, Bintulu, Miri, Limbang dan perairan pantai negeri itu.

Tambahnya, hujan sederhana lebat di Sarawak dijangka berlaku pada lewat petang dan malam sehingga Rabu ini.

"Di Sabah, hujan sederhana yang berlaku di bahagian Kudat, Pantai Barat, Labuan dan kawasan pedalaman dijangka berterusan sehingga hari ini," menurut kenyataan jabatan itu yang dikeluarkan hari ini.

Menurutnya, keadaan angin kencang timur laut dengan kelajuan 40 hingga 50 kilometer sejam dan laut bergelora dengan ombak mencapai ketinggian 4 hingga 5 meter di kawasan perairan Pantai Timur Semenanjung, Sarawak dan Sabah dijangka berterusan sehingga Ahad depan.

Jabatan itu turut mengingatkan orang ramai, sekiranya berlaku banjir mereka dinasihatkan mendapatkan maklumat mengenai paras air bahaya dari Jabatan Pengairan dan Saliran (JPS).

"Mereka diminta mematuhi nasihat pihak berkuasa untuk berpindah jika banjir," menurut kenyataan itu.